



ИҚТИСОДИЁТ ВА БОШҚАРУВДАГИ ИСЛОҲОТЛАРНИНГ БОРИШИ ЮЗАСИДАН ФИКР АЛМАШИЛДИ

Ўзбекистон Республикаси Президенти Шавкат Мирзиёев 16 декабрь куни ўзининг иқтисодий тараққиёт, самарали бошқарув ва халқаро ҳамкорлик масалалари бўйича маслаҳатчиси Сума Чакрабартини қабул қилди.

Унда мамлакатимиздаги иқтисодиёт ва бошқарувни ислоҳ қилиш доирасида эришилган натижалар ва бу борадаги келгуси режалар кўриб чиқилди.

Давлатимиз раҳбари барча муҳим йўналишлардаги янгиланишларга тўхталар экан, иқтисодиётнинг устувор тармоқларини модернизация қилиш ва рақобатбардошлигини

таъминлаш, давлат бошқарувида трансформация жараёнларини, шунингдек, рақамлаштириш ва инвестицион жозибадорлик борасидаги ишларни давом эттириш муҳимлигини алоҳида таъкидлади.

Сума Чакрабартини дунё иқтисодиётидаги мураккаб вазиятда Ўзбекистон томонидан қўрилатган самарали чора-тадбирлар иқтисодий

ислохотларнинг динамикасини таъминлаётганини таъкидлаб, бу соҳадаги биргаликдаги саъй-ҳаракатларни янги босқичда давом эттиришни қўллаб-қувватлади.

Учрашувда кун тартибидagi бошқа муҳим йўналишлар ҳам кўриб чиқилди.

ЎЗА

ДОЛЗАРБ МАВЗУ

“ЯШИЛ” ЭНЕРГЕТИКА

бугунги кун талаби, тараққиёт истиқболи



Решад Ганиев олган сурат.

Самарадорлиги паст ва харажати катта, атроф-муҳитга сезиларли салбий таъсир кўрсатиб, кўп ресурс талаб этадиган иқтисодиётнинг эски моделини енгиб ўтиш бугуннинг энг долзарб муаммоларидан биридир.

Дунёнинг кўплаб мамлакатлари атроф-муҳитни муҳофаза қилиш иқтисодиёт учун юк деб ҳисобланадиган анъанавий моделдан экологик ривожланишнинг двигатели бўлган “яшил” иқтисодиёт моделига ўтиш йўлида ўз сиёсатларини тубдан қайта кўриб чиқмоқда. Бинобарин, янги глобал “яшил” тараққиёт жаҳон иқтисодиёти ва молиявий тизими барқарорлигини таъминлайди.

Лўнда айтганда, “яшил” иқтисодиёт қайта тикланувчи, ресурстежамкор, чиқитсиз ёки кам чиқитли технологиялар кенг қўлланиладиган, иссиқхона газлари паст даражада чиқариладиган, атроф-муҳит учун хавфи сезиларли даражада камайтирилган, табиий ресурслардан самарали фойдаланишга асосланган иқтисодиётдир.

Мана шундай шароитда давлат ва жамият қурилиши соҳасида изчил,

босқичма-босқич кечаётган ислохотлар доирасида юртимизнинг “яшил” иқтисодиётга ўтиши ва барқарор ривожланиш мақсадларига самарали эришиш жараёнини тезлаштиришга қаратилган масалалар илгари сурилиб, иқлим ўзгаришига қарши курашиш устувор вазифалардан бири экани белгилаб олинмоқда.

Давоми 3-бетда

ТЕМИР ЙЎЛ СОҲАСИДАГИ ЙИРИК ЛОЙИҲАЛАР БЎЙИЧА АХБОРОТ БЕРИЛДИ

Президент Шавкат Мирзиёевга темир йўл соҳасидаги йирик минтақавий лойиҳаларнинг амалдаги ҳолати ва келгуси режалар юзасидан ахборот берилди.

Мамлакатимиз учун транспорт йўлакларини диверсификация қилиш, жаҳон бозорларига тез ва эркин чиқиш жуда муҳим. Шу боис, давлатимиз раҳбари халқаро анжуманларда бу масалани доим кўтариб, амалий ташаббусларни илгари сурмоқда. Қўшни ва манфаатдор мамлакатлар билан “тил топишиб”, лойиҳалар жадаллаштирилмоқда.

Улардан бири 454 километрлик “Ўзбекистон — Қирғизистон — Хитой” темир йўли қурилишидир. Маълумки, жорий йил 14 сентябрда Самарқандда бу лойиҳа бўйича уч томонлама Англашув меморандуми имзоланган эди. Ноябрь ойида Хитойнинг “Биринчи лойиҳа-тадқиқот

институтини” томонидан дала тадқиқот ишлари олиб борилди.

Ҳисобот давомида режадаги ишлар тўғрисида ҳам айтиб ўтилди. Хусусан, Бишкек шаҳрида лойиҳа офиси ташкил этилади. Лойиҳани бошқариш услуби ва тартиби муҳокама қилинади. Халқаро молия ташкилотлари билан музокаралар ўтказилади. Умуман, 1 июнгача лойиҳанинг техник-иқтисодий асосини тайёрлаш режалаштирилган.

Соҳадаги яна бир минтақавий лойиҳа “Термиз — Мозори-Шариф — Кобул — Пешовар” темир йўлидир. Афғонистондаги мураккаб вазиятга қарамай, бу борада ҳам сезиларли силжишлар бор.

Хусусан, жорий йил ёзда Афғонистоннинг Мозори-Шариф шаҳридан Покистоннинг Торхам шаҳригача тадқиқот экспедицияси ўтказилди.

Қайд этилганидек, лойиҳа доирасида 765 километр темир йўл қурилиши мўлжалланмоқда. Келгуси йили бу бўйича лойиҳа офиси ташкил этиши, халқаро консалтинг компаниясини жалб қилиш, инвесторлар билан музокаралар ўтказиш режалаштирилган. Шулардан келиб чиқиб, лойиҳанинг техник-иқтисодий асоси тайёрланади.

Президент Шавкат Мирзиёев бу режаларни маъқуллаб, ҳамкор мамлакатлар билан “йўл хариталари” ишлаб чиқиш бўйича кўрсатмалар берди.

Бу икки темир йўлнинг қурилиши Ўзбекистоннинг транспорт коммуникацияларини диверсификация қилиб, логистика имкониятларини кARRасига кенгайтиради.

ЎЗА

ТАҲЛИЛ

МЕТАЛЛ МАҲСУЛОТЛАРГА ЭҲТИЁЖ ОШМОҚДА

Металлар Менделеев даврий жадвалидаги кимёвий элементларнинг катта қисмини ташкил этади. Иқтисодиётда эса металлургия сердаромад тармоқлардан. Яъни ҳеч бир мамлакат саноати ривожини металлсиз тасаввур этиб бўлмайди. Кончилик, кимё саноати, қурилиш, машинасозлик, электротехника тармоқлари бўладими, барчасининг тараққиёти бевосита металл ишлаб чиқариш кўрсаткичлари билан боғлиқ. Бошқа томондан, уларнинг ривожини қора ва рангли металл маҳсулотларга бўлган эҳтиёжни кундан-кунга оширяпти.

Давоми 4-бетда



ХОРИЖДАГИ ВАТАНДОШ

ҚАЛБИДА ҒУРУРИ ЮКСАК ЁШЛАР

Узоқ Германияда “митти” Ўзбекистон яратган қиз

Бундан ўн беш йил аввал Самарқанд давлат чет тиллар институтини ўқиб юрган Шахло Халилова хорижга кетиши-ю, ўзга юртда ўз ўрнини топишини тасаввур ҳам қилмасди. Чунки унда бундай истак ҳам, умид ҳам бўлмаган. Аслида, журналистикага меҳр қўйган кизини отаси ҳатто Тошкентда юбормаган, “Самарқандда шунча олийгоҳ бор-ку, истаганингда ўқийвер”, деган. Институтда дарс берадиган қариндоши уни чет элда ўқиш учун интилишга, шу орқали дунё кўриб, тилларни янада яхши ўрганишга ундади. Унинг ёрдами билан Германияга бориш учун “Au-Pair” дастури бўйича хужжат топширди.

Давоми 5-бетда

“ЯНГИ ЎЗБЕКИСТОН” УЧУН МАҲСУС

ИҚТИСОДИЙ ДИПЛОМАТИЯ ЎЗБЕКИСТОНДА ТЎҚИМАЧИЛИК САНОАТИ САЛОҲИЯТИНИ ИЛГАРИ СУРИШДА МУҲИМ ВОСИТА БЎЛМОҚДА

Бугунги кунда тўқимачилик ва тикув-трикотаж саноати Янги Ўзбекистонда етакчи ҳамда жадал ривожланаётган тармоқлардан биридир. Сўнгги йилларда саноат ишлаб чиқаришининг йиллик ўсиши ўртача 20 фоиздан ошди. Мамлакатимиз тўқимачилик саноатини диверсификация қилиш, тайёр маҳсулотлар экспортини рағбатлантириш борасида амалга оширилаётган ишлар самараси ўлароқ, Ўзбекистоннинг бу жаҳондаги салоҳияти тобора юксалмоқда.

Давоми 2-бетда



ҲАЁТБАХШ ИСЛОҲОТЛАР

ТУНУ КУН ИШЛАЙДИГАН ШОҲОБЧАЛАР

туризм ривожини ва аҳоли бандлигига хизмат қилмоқда

Риштон туманидаги “Марказ” маҳалла фуқаролар йиғини хулуидидаги Ар-Рошидоний кўчасида туну кун ишлайдиган 80 та хизмат кўрсатиш шохобчаси ишга туширилиб, 260 дан ортиқ янги иш ўрни яратилди.

Давоми 2-бетда

17 ДЕКАБРЬ — ОҒАҲИЙ ТАВАЛЛУД ТОПГАН КУН

МИРОБЛИК, ИЖОД, ИЛМ МАШАҚҚАТЛАРИ

Огаҳийнинг ўзбек мумтоз адабиётида тутган ўрни ва тарихий асарлари кўпчиликка маълум. Шу билан бирга, Муҳаммадризо Огаҳий ўз даврининг энг нуфузли амалдори — Хива хонлигининг бош мироби ҳам бўлган. Қуйи Амударё бўйларидаги Қизилқум ва Қорақум оралиғида жойлашган воҳада сув ҳаёт манбаидир. Шу боис, мироблик Хоразмда энг нуфузли вазифа ҳисобланган. Зеро, давлат иқтисоди қишлоқ хўжалигига асосланган Хива хонлигида ушбу касб юрт ободонлиги, давлат иқтисодиёти, деҳқончилиги билан боғлиқ эди.

Давоми 6-бетда

